

## Portal gratuit per reservar chombras

■ (anr/vi) La hotellaria e parahotellaria svizra duainsurvegnir in portal online gratuit per reservaziuns. Quai pretenda cussegliera naziunala *Silva Semadeni* (ps/GR) en in postulat ch'ella inoltrescha oz.

La finamira dal postulat èsi da promover la hotellaria e parahotellaria. Il cussegl federal duai examinar la pussaivladad d'installar in portal gratuit per reservar stanzas d'hotel u abitaziuns da vacanzas. Semadeni propona che Svizra Turissem realiseschia in tal portal en collavuraziun cun la branscha.

Giasts che vegnian intermediads antras portals commercials sajan clients che custian bler, scriva la politichera grischuna en il postulat. «La Scola auta per economia e turissem en il Vallais schazegia che mintga hotel svizzer paja en media cumissiuns da 30 000 francs per firmas da reservaziun online.»

L'exempel da Zermatt mussia ch'in agen portal da reservaziun portia respargns considerabels per l'industria d'alloschis. Novas tecnologias per tschertgar stanzas possian reunir las infurmaziuns da differents portals e mussar al giast las stanzas libras ed ils pretschs d'hotels e d'abitaziuns en tuttas destinaziuns.

In portal da reservaziun gratuit e senza cumissiuns muntia ina promoziun concreta da la branscha turistica che haja da patir pervi dal ferm franc svizzer.